



L'animazion la é joena con “Marijene - Picoi da Mont”

Ai 23 de mèrz te oratorie de Poza, l'é stat portà dant l projet per animatores anter i 18 e i 29 egn, finanzia dal Comun general de Fascia e dai Comitac manifestazion di paijes, en colaborazion con Apt Val di Fassa, Museo Ladin e Accademia d'Impresa

No demò formazion ma ence l met de troèr n lurier per i joegn anter i 18 e i 29 egn. Chest l'é chel che sporc **“Marijene - Picoi da Mont”** l projet portà dant, ai **23 de mèrz** te oratorie de Poza, olache à tout pèrt ence la procuradora **Elena Testor**, desvalives **responsaboi** di **Comitac manifestazions** di comuns fascegn e l diretor de l'Apt Val di Fassa, **Andrea Weiss**. La scomenzadiva endrezèda jà l'an passà col Pian di joegn de raion “La Risola” con n cors de formazion e la colaborazion co la “Glu animazion”, l'istà che vegn “la vegn grana”, tolan sù autonomia, de gra a l'empegn de **Angela Pederiva**, coordinadora del projet, de **Claudia Marchetti** e **Lisa Brunel**, doi joenes che à tout pèrt, con n bon ejit, al percors de l'an passà, e jà l'istà passà les à podù lurèr desche animatores a Cianacei e Poza. La doi touses, che endèna la scontrèda les à palesà sia esperienza e la gaissa che les à ja per endrezèr “Marijene - Picoi da Mont”, les sarà la referentes (col coordinament de Pederiva) del grop che tolarà pert (debut) a la formazion che ponta via ai 8 de oril e vè inant fin ai prumes de jugn. «L'obietif – despiega Angela Pederiva – l'é formèr feugures profescionèles per la gestion de l'animazion da d'istà, endrezèda dai Comitac manifestazions e outa soraldut ai ghesé più joegn, con desvaliva ativitèdes, jeghes e raides sorides. Na entrategnuda gustegola ma ence leèda a nosc teritorie, besegn palesà da desferenc operatores turistics desche la sociazion Ladinhotel».

I joegn enteressé (na dejina à jà portà ite sia ensclinuazion en mercol a la fin de la prejentazion) à l met de tor pèrt al cors con esperc del studie de pedagogia de Pardac per emparèr a troèr n leam con bec picoi e gregn e a gestir l benvegnù e l'animazion di gropes, ma ence leziions de geografia, cultura e lengaz de Fascia con scontrèdes te Museo Ladin e ence scontrèdes più prateghes con raides coi compagnadores de teritorie. La formazion la é averta a desvalives bec (la leziions te Museo a duc i operatores turistics), anter chisc na dejina sarà selezionèda per l'animazion da d'istà coi Comitac, ma l'obietif l'é chel de jir inant ence dò la sajón. Belapontin, “Marijene - Picoi da Mont”, **sostegnù da Comun general de Fascia** con la colaborazion de i **Comitac manifestazions** di paijes, **Apt Val di Fassa** e Museo Ladin, dèsc l met ai joegn de meter ensema, con **Accademia d'Impresa**, n **projet profescionèl** da portèr dant ai Comitac, ma ence ai hotie de val enteressé.

Per informazions e ensclinuazions (dant che sie fora l 1m de oril): piata facebook “Marijene - Picoi da Mont”; angela.pederiva@hotmail.com - cell. 3336315381.

Comun General de Fascia
Strada di Pré de geja, 2
38036 Pozza di Fassa (TN)
tel. +39 0462 764500 fax 763046

Elisa Salvi
ufficio.stampa@comungeneraldefascia.tn.it